

Nos Tutu

Ta bisá ku un loko no sa ku e ta loko. P'e, su lógika ta parse totalmente rasonabel.

Talbes esei ta apliká den mi kaso. Talbes mi kabes no ta bon. Talbes ta bèrdat ku mi ta un “sèks maniak” manera a wòrdù bisá. Ma pèrmití e loko aki pa presentá su lógika. E lektor por husga kuantu skruf a kai for di e koko aki.

Un sèks maniak? Kisas. Mi ta kulpabel di skirbi bastante kolumna den korant tokante seksualidat. Mi ta kulpabel di duna charla na gruponan di hóben tokante seksualidat. Mi ta kulpabel di duna siñansa na iglesianan tokante seksualidat. Mi ta kulpabel di skirbi un buki (*Si Bo Stimámi...*) tokante seksualidat. Talbes “sèks maniak” ta un nòmber meresí.

Ma pakiko mi ta trese seksualidat dilanti ku tan frekuensia? **Pasobra nos pensamentu kiboká tokante seksualidat ta kousa problema grandi den nos komunidad.** Di bèrdat, un di e motibunan prinsipal ku nos ta haña nos den e tutu aktual ta pa motibu di nos mentalidat pa ku seksualidat.

Kiko mi ke men? Esnan ku konosé mi punto di bista sa ku mi ta konvensé ku e idea ku un kondon ta garantisá “safe-sex” ta un mentira. Nan sa ku apstenensia di tur relashon seksual te matrimonio ta mi lema. Ma (talbes manera un loko) mi no ta kere ku mi ta un sèks maniak pa keda enfatisá esei. **Mi ta konvensé ku e praktika di apstenensia ta evitá i prevení tur klase di problema den nos komunidad.**

E filosofia ku por tene relashon seksual fuera di matrimonio basta ku bo ta “protehá” ku un kondon ta promové un sistema di bida parotín. Esun ku ta kere e mentira ku e por gosa sèks sin konsekuensia penoso lo riska tin mas aventura seksual ku esun ku ta kere ta mihó pa posponé sèks te matrimonio. Resultado di e mentalidat aki ta un epidemia di enfermedatnan venérico... presis loke nos islanan ta eksperensiá awendia!

Ademas, e yùfrou ku tin mas kontakto seksual, tin mas chèns pa sali na estado sin ta kasá; i esei tambe tin konsekuensia serio. Tantu yònkuman ta tata; nan tin yu plamá aki ayá. Ma nan no tin ningun klase di idea kiko ke men pa ser tata.

Estudionan ta indiká bon kla ku yunan ku ta lamta sin tata den kas tin mas chèns pa eksperensiá pobresa, tin mas chèns pa kai den un bida di kriminalidat, tin mas chèns pa frakasá na skol. Esei siendo e kaso, e yu tin ménos chèns di haña un bon trabou, ku e konsekuensia ku e no tin sèn pa kuida su famia.

Pasobra tantu yùfrou tin yu sin ta kasá, nan tin ku bai traha pa haña nan pan di kada dia. (E mener irresponsabel talbes ta kue djòp.) E mama tin ku laga su yu un kaminda ora e ta bai traha. Pesei e yu ta bai krèsh dia despues di parto, sigui pa klùterskol, skol básiko, KSB, i djei...ken sa!? Ora e yu ta na kas, gran parti di su tempu mama no t'ei. Awendia pa motibu di e tutu aki, **na lugá di enkurashá mayornan pa invertí mas tempu pa nan yunan, nos ta rèk e añanan ku muchanan mester bai skol (awor dos aña di klùterskol ta obligatorio) i ke rèk e oranan ku e mucha ta na skol (alargamentu di e orario di skol).**

Talbes mi kabes no ta bon. Talbes mi ta un sèks maniak. Ma segun mi punto di bista, nos deseo pa libertat seksual tin un rabu largu di tur klase di problema den nos komunidad.

Ta pa nos **bienestar** e Dies Mandamentunan ta bisa “*No kometé adulterio*” (Eksodo 20:14). Ta pasobra Dios ta **stima** hende, El a bisa “*apstené boso di immoralidat seksual*” (1 Tesalonisensenan 4:3). Dios ke bo bon! Skuch'E!

Bo por ahustá bo bida na Dios Su instrukshon i evitá un bòshi di problema. Of bo por sigui hòrta shòrt, ignorando Dios Su Palabra...presis loke nos ta hasi awendia. Ma (segun perspektiva di e loko aki) e ora ei, bo mes ta kontribuí na e tutu ku nos ta haña nos aden awendia.